

**Maktabgacha va maktab ta'limi vaziri jamg'armasi hisobidan har oylik  
ustama to'lanadigan nomzodlarning 2-bosqich kasbiy mahoratini baholash  
bo'yicha suhbat o'tkazish tartibi to'g'risidagi  
NIZOM**

**I. Umumiy qoidalar**

1. Mazkur Nizom O'zbekiston Respublikasi Vazirlar Mahkamasining "Xalq ta'limi vaziri jamg'armasi faoliyatini tashkil etish chora-tadbirlari to'g'risida" 2022-yil 2-avgustdagi 425-son qaroriga muvofiq har oylik ustama to'lanadigan nomzodlarning 2-bosqich kasbiy mahoratini baholash bo'yicha suhbat o'tkazish tartibi belgilaydi.

2. Ushbu Nizom Maktabgacha va maktab ta'limi tizimidagi malakali pedagog kadrlarga tanlov asosida har oylik ustama to'lash bo'yicha suhbat (keyingi o'rinlarda – suhbat) o'tkazishga nisbatan tatbiq etiladi.

3. Har oylik ustama to'lash bo'yicha suhbat o'tkazish tartibi va mezonlari Maktabgacha va maktab ta'limi vazirining buyrug'iga asosan belgilanadi.

**II. Suhbatni tashkil qilish**

4. Har oylik ustama to'lash bo'yicha suhbat o'tkazish jarayoni oshkoralik, kengashib ish ko'rish, xolislik, teng huquqlilik, shaffoflik tamoyillari asosida tashkil etiladi.

5. Suhbat o'tkazish kunlari, manzili to'g'risidagi ma'lumotlar hamda suhbat o'tkazish tartibi to'g'risidagi nizom va baholash mezonlari Maktabgacha va maktab ta'limi vazirligining rasmiy veb-sahifasi orqali e'lon qilinadi.

6. Suhbat Nizomiy nomidagi Toshkent davlat pedagogika universiteti (keyingi o'rinlarda — Universitet), Universitet huzuridagi ilmiy-amaliy psixologlar markazi, Ixtisoslashtirilgan ta'lim muassasalari agentligi, Pedagoglarni yangi metodikalarga o'rgatish milliy markazi rahbar va xodimlari hamda jamoatchilik vakilidan iborat Suhbat komissiyalari tomonidan o'tkaziladi.

7. Universitet vakili komissiya raisi hisoblanadi.

8. Suhbat jarayonlari o'tkazilayotgan joyda komissiya a'zolari va nomzoddan tashqari begona shaxslarning bo'lishiga ruxsat berilmaydi.

**III. Suhbatni o'tkazish va baholash mezonlari**

9. Suhbat bosqichida Oliy ta'lim, fan va innovatsiyalar vazirligi huzuridagi Bilim va malakalarni baholash agentligi tomonidan o'tkazilgan 1-bosqich test sinovlari natijasiga ko'ra maksimal ballning 80 foizi va undan yuqori natija ko'rsatgan nomzodlar bilan kasbiy faoliyatiga doir tayyorlangan taqdimoti bo'yicha suhbat o'tkaziladi.

10. Suhbat komissiyasi suhbat jarayonlarini baholash ishlarini elektron platformadan foydalangan holda amalga oshiradi.

11. Taqdimot hamda savol-javob uchun 15 daqiqa vaqt ajratiladi.
12. Suhbat natijalari bo'yicha baholash maksimal **10 ballik tizimda** mazkur Nizomning 1-ilovasidagi baholash mezonlariga muvofiq amalga oshiriladi. Bunda, 2-bosqichga chiqqan hamda nomzodning kasbiy mahoratini baholash bo'yicha suhbatdan **4 (to'rt)** balldan kam ball olgan nomzodlar g'oliblikka tavsiya etilmaydi.
13. Suhbat natijasi bo'yicha nomzodlar tomonidan to'plangan ball Suhbat komissiyasi a'zolarining nomzodlarga qo'ygan jami ball miqdorlarining o'rtachasidan kelib chiqib belgilanadi.
14. Suhbat jarayonida nomzodlar mazkur Nizomning 2-ilovasiga muvofiq Suhbat komissiyasining har bir a'zosi tomonidan baholash mezonlariga ko'ra baholanadi.
15. Suhbat komissiyasi a'zolari tomonidan baholash mezonlariga ko'ra nomzodlarga qo'yilgan ballarning jami miqdori mazkur Nizomning 3-ilovasiga muvofiq maxsus shakldagi baholash qaydnomasiga qayd etiladi va o'rtacha ball chiqariladi.
16. Suhbat va taqdimot jarayonlarida savollar va ularga berilgan javoblar mazkur nizomning 4-ilovasiga muvofiq stenografik usulda suhbat o'tkazish varaqasiga qayd etiladi. Baholanuvchilar ularga berilgan savollar va o'zining javoblarini jurnalga imzo qo'yish orqali tasdiqlaydi. Nomzodlarning kasbiy mahoratini baholash bo'yicha o'tkazilgan Suhbat jarayonlarida shaffoflikni ta'minlash maqsadida suhbat jarayoni videotasvirga olinadi.
17. Komissiya qarorlari uning majlisida komissiya a'zolarining yarmidan ko'pi ishtirok etganda vakolatli hisoblanadi.
18. Nomzodlar suhbat jarayonida uzrsiz sababga ko'ra ishtirok etmagan bo'lsa, shuningdek, nomzodlar dalolatnoma asosida suhbat jarayonidan chetlashtirilgan bo'lsa, Suhbat komissiyasi tomonidan unga nisbatan "tanlovdan o'tmadi" degan qaror chiqarilishi uchun asos bo'ladi.
19. Suhbat komissiyasi qarori **bayonnoma** shaklida mazkur Nizomning 5-ilovasiga muvofiq rasmiylashtiriladi hamda komissiya raisi va a'zolari tomonidan imzolanadi. Bayonnomalarning asli Maktabgacha va maktab ta'limi vazirligida saqlanadi.

#### **IV. Suhbat natijalarini e'lon qilish**

20. Saralash natijalariga ko'ra har oylik ustama belgilangan pedagog kadrlar ro'yxatini tasdiqlash va ularga Jamg'arma hisobidan ustamalarni to'lash bo'yicha Maktabgacha va maktab ta'limi vazirining buyrug'i qabul qilinadi.
21. Ustama olish huquqiga ega bo'lgan pedagog kadrlar ro'yxati saralash yakunidan so'ng 6 ish kunida Maktabgacha va maktab ta'limi vazirligining rasmiy veb-sahifasida e'lon qilinadi.

#### **V. Suhbat natijalari yuzasidan shikoyat qilish**

22. Suhbat o'tkazish jarayoni natijalari yuzasidan berilgan murojaatlarni ko'rib chiqish uchun apellyatsiya tashkil etiladi. Apellyatsiya komissiyasi 5 kishidan iborat tarkibda Maktabgacha va maktab ta'limi vazirligi tomonidan tasdiqlanadi.

Apellyatsiya komissiyasi tarkibiga Suhbat komissiyasi tarkibidan a'zo kiritilmaydi.

Apellyatsiya komissiyasi yig'ilishi komissiya a'zolarining uchdan ikki qismi ishtirok etsa, vakolatli hisoblanadi.

Suhbat komissiyasi qaroridan norozi bo'lgan nomzodlar tanlov natijalari e'lon qilingan kundan boshlab, 48 soat mobaynida apellyatsiya komissiyasiga yozma murojaat qilishi mumkin. Bunda, appelyatsiya yuzasidan murojaat qilingan sana pochta bo'linmasining yozma murojaat qabul qilinganligi xatining konvertiga muhr bosilgan shtempeldagi sana hisoblanadi.

Nomzodlarning shikoyatlari ro'yxatga olingan kundan boshlab, uch ish kunida ko'rib chiqiladi hamda nomzodlar yozma ravishda xabardor qilinadi.

23. Apellyatsiya komissiyasi Suhbat komissiyasining qarorini o'zgartirishsiz qoldirish yoki uni bekor qilish haqida qaror chiqaradi.

## **VI. Yakuniy qoidalar**

24. Suhbat komissiyasi yoki apellyatsiya komissiyasi qarori ustidan qonun hujjatlarida belgilangan tartibda sudga shikoyat qilinishi mumkin.

25. Ushbu Nizom talablarining buzilishida aybdor bo'lgan shaxslar qonun hujjatlariga muvofiq javob beradilar.